

欽定剿平三省邪匪方略

正編

九

四

卷之三

七

七

七

欽定剿平三省邪匪方略正編卷二百十五

庚申年

十一月初八日

丙戌

倭什布奏言查高二馬五大

股賊衆經

臣

等在溢水痛剿後卽亡命逃竄由

楊家牌樓小文峪河魯家坡等處直向西南奔

竄沿途搜獲程志興等十四名僉供高馬二掌

櫃因陝省兵多又擄不出糧石纔到湖北不料

馬兵利害連次擊敗前日在溢水地方被官兵

殺死許多矛子手後面追兵又緊是以不敢行走大路連夜翻山緊走我等因黑夜落後想等官兵過去再走等供查該犯等係積年猾賊當卽一併正法

臣

與明亮等商該匪翻山亂竄若

不分路兜攔不能痛加剿戮適接長齡來咨已

帶兵抄往鮑家店一帶迎頭截剿東北二百既

有鎮臣德昌在黃 地灘帶兵堵禦又有長齡統

率勁旅抄前迎擊該匪斷不能東竄惟二竹一

帶道路綿長必須四面扼截方能有濟

臣

當與

明亮分路各帶馬步官兵緊躡賊蹤不與以暇

十九二十等日

臣

由竹山之談家溝一帶截擊

明亮由竹谿之得勝坡等處攔剿兩路官兵跟

蹤躡逐二十一日至覃家坪會合兩路擒殺賊

探曹健成等八十一名散出被擄難民李世奉

楊氏等三百十七名口均係附近甫經被擄良民隨交候補同知阿霖候補縣丞周以焯逐加撫卹發給路票釋回不使失所該匪經我兵逼剿緊急行走倉忙沿途拋棄騾馬器械糧食不少其所過之處並不焚燒房屋二十二日已由竹山屬之周家灣一帶分起由銅錢關逃回陝省向白河西南奔竄

臣

同明亮正在追剿間途

次小河口據叅將姚國梁稟報自陝省平利屬
竄來一股賊匪由八卦廟松杉河一帶焚掠賊
探已至連線河明亮當卽帶兵趕至距連線河
十五里之黑龍洞天色已晚據前探報稱該匪
等聞有大兵到來連夜翻山走羅筐巖到竹谿
河屯紮明亮卽於三更率領富翰塔津保恒坤
總管都當阿協領依桑阿等帶領馬隊乘夜衝

撲賊營

臣

倭什布督率侍衛雙福花尙保副將

吉林泰朱士奉叅將烏爾卿額等督兵接應至

五更時分明亮督兵甫抵草場壩卽遇拏哨賊

匪驚喊賊衆潰逃翻山四竄明亮乘有月色督

率馬隊射斃賊二百餘名生擒楊中林等四十

七名正在攪殺適

臣

帶兵趕到復斃賊匪數十

名該匪卽由七里溝翻界嶺出銅錢關奔回陝

境當卽提訊楊中林等供稱此股賊匪係高家
營高二掌櫃帶領只有一千五六百人怕與官
兵打仗聞得高三馬五已到湖北所以趕來找
尋合夥營中還有管事楊元帥袁元帥俱不知
名字昨夜被官兵衝散營盤不知去向我等是
矛子手等供當將該犯楊中林等三十一名均
卽正法其餘廖新客等十六名訊係被擄未久

概予寧釋查此股賊匪經官兵擊敗現由七里
關一帶遁回陝省相隔不遠勢必歸併合夥適
接長齡咨會已帶兵由東北赴界外截剿臣等
乘勝由西南進逼二十五日趕至陝省銅錢關
飛咨長齡夾擊合攻趁此賊氛殘敗趕緊會剿
集事以冀少慰

聖鑒再臣遵

旨傳諭明亮據明亮望

闕免冠碰頭並稱明亮係滿洲世僕受

恩至重乃福薄糊塗謬存在楚顧楚之愚見未將兩

起賊衆緊追赴陝夾擊今蒙

聖訓嚴明惶悚愧悔無地自容復蒙

天高地厚之恩不卽從重治罪

賞給藍翎侍衛

宥過生成惟有竭此血誠隨同長齡認真堵剿以冀
稍贖前愆等情伏查明亮凡遇打仗殺賊從不
稍留餘力其兩次不行出境追剿因顧楚心殷
以致錯謬非敢有心取巧今蒙

皇上格外施恩明亮實知愧知懼理合據情代謝

天恩奏入

上命軍機大臣傳諭倭什布曰高二馬五在賊首中

最爲兇悍可惡今馬五股中復有高三附入必須
迅速搜捕此次倭什布等所辦尙好該逆等旣經
同竄陝境自必歸併合夥現在長齡已帶兵由東
北追剿倭什布等由西南進逼正可兩面夾擊痛
加殲戮倭什布等務須倍加奮勉協力會剿若能
將此二股賊匪在陝楚交界搜捕淨盡殲擒賊首
卽係伊等之功朕必加之重賞一俟此二股竄匪

辦竣倭什布係湖北巡撫應帶領廣東廣西之兵
仍回楚省邊境督率防堵其馬隊官兵皆係吉林
黑龍江勁旅自不應置之閒地專爲堵禦之用此
時川匪竄入陝省者股數較多需兵協剿明亮應
卽帶領馬隊並侍衛富翰等與長齡同赴陝省聽
候經畧調度至明亮本係

皇考所遺宿將是以朕疊加委任卽累獲愆尤朕猶屢

行寬貸非不欲加意保全如果此後知感知懼痛
改前非帶兵奮勉立功自効朕仍當加之重賞若
始終蒼猾性成復蹈故轍朕亦豈能以伊係舊人
曾著微績遂廢

祖宗之國法耶著倭什布面行傳知明亮看伊此後之
福分如何耳

初九日

丁亥

上命軍機大臣傳諭長麟陸有仁慶成曰剿辦教匪大局總宜將各股賊匪逼入川省則賊勢不能散漫官兵得以併力剿辦年來朕與在廷諸臣均持此議蓋川省辦理團勇築堡等事極爲認真該處民人同心禦賊實能踴躍急公是以辦理較易卽該省民人忿賊日久亦深願賊匪竄入川境後可以痛加剿殺近日額勒登保德楞泰奏到之摺其

大意亦思逼賊入川乃各股竄匪皆不肯在川境

屯集卽被官兵逼剿緊急折而入川亦不過暫時

躲避旋即竄回就目前情形而論賊總在陝境爲

多可見川省團練認真爲賊人所畏憚而陝省地

方則民心散懈於團勇築堡等事不能實力奉行

任賊來往自如總由地方官不能善爲勸諭督率

辦理以致賊來多有裹脅而守禦事宜全屬有名